

四庫全書

史部

欽定四庫全書

硃批諭旨卷二百十五之二

硃批鄂彌達奏摺

雍正十年正月十六日廣東巡撫臣鄂彌達謹

奏為奏

聞事竊照陳美倫曾合二犯散劄聚衆謀為不法業經

拏獲訊供經臣等兩次會

奏在案所有陳美倫供出之夥黨羅京相等犯以及

覆行嚴訊曾合供出同黨住居西省之錢珍等犯
及住居本省之溫崇新等犯臣即選差員弁幹役
分路飛往密拏並密札廣西撫臣轉飭該地文武
官弁協拏去後今據臣標外委把總黃雲龍把總
李秉鈞李育外委千總鄔連等陸續拏獲梁其芬
錢珍植直寶陳夢吉吳惠陳夢濟陸始賓梁其珍
鄧洪佩梁文廷植瓊玖植滄洲等犯并在錢珍家
內起獲天寶年號偽劄五張又於林王茂家窩藏

之竹箱內搜獲旗印詩扇等物并拏獲本省之溫
崇新溫殿彩游挺仙梁亞十李燦章等犯臣即帶
至內署弔并曾合等犯與司道密行嚴訊其大逆
不法之處已據各犯直認不諱至詰其天寶年號
劉付來歷則據錢珍等供出梁二恭胡百千知道
等語臣即委員弁密拏務獲究擬外正在繕摺間
據委員左興稟稱於西省蒼梧縣地方會同地方
官拏獲陳彥清又在平南縣地方拏獲羅京相羅

君秀之子羅亞廣韋朝明龔洪潘才潘清歐石福
郭上清李滿并在潯州府拏獲楊法倫黃泗廻等
稟報前來臣即差員前赴平南縣迅提已獲一千
人犯來東質審俟解到另行審明奏

聞外其未獲陳漢等犯仍嚴飭委員多方密拏務獲解
究為此先行具摺奏

聞并將先獲各犯口供及起獲印劄另封進

呈伏乞

皇上睿鑒謹

奏

拏獲各犯甚屬可嘉所差委員弁當厚加賞擢以示獎勵此案須徹底嚴究務盡根株不可少涉畏愞率忽致有疎漏

同日又

奏為奏

聞事竊查粵東潮州一府與福建江西連界兵民雜處

人烟輳集米穀最為緊要因去歲豐收之後隣省
赴潮糴買者多恐今歲三四月間青黃不接米價
稍昂亦未可定不得不預為綢繆之計查廣西梧
州府穀價現在甚平每石價值三錢餘臣與司道
等官詳議委員前往梧州採買二三萬石存貯廣
州府倉如三四月間潮州府屬米價昂貴即將潮
州原貯倉穀量加出糴接濟民食以平市價即以
此項買貯穀石舟運至潮補倉如潮屬價平而省

城米價稍昂即將此項穀石在省減價平糶歸補
原項一轉移間則米價常平於民生甚有裨益但
查藩庫錢糧並無閒款可動惟太平關有自雍正
九年五月起至十一月止收過羨餘銀三萬六千
二百兩零現存司庫每年俱於七月間方行解部
此項尚無急需今暫為動支銀一萬兩交與試用
知縣喬德徵委令前往梧州府地方買運訖所動
稅羨俟糶出穀價歸還按期解部事關籌畫民食

暫動帑項理合繕摺奏

聞伏乞

皇上睿鑒謹

奏

覽奏已悉咨部存察可也

同日又

奏為請

旨事竊照粵東地處海濱逼近外國其來廣貿易者實

繁有徒惟恐內地姦宄勾通外番色目生事不法
臣時加嚴飭各地方官密行訪察詎有呂宋西洋
人安多牛方濟各等貿易來廣於雍正八年五月
間憑通事林興觀等代往佛山地方用價一十五
兩潛向民人柯勝昌買得奴婢一口名喚碧桃年
甫十二歲順便攜帶歸國迨至九年四月內經臣
廉訪得實適安多牛等復貿易至廣當飭南海縣
訊據該番供認價買碧桃歸國原期撫養作女今

自知悔罪願甘立限送還臣察其情詞懇切即宣

諭

皇上聖德並示以寬大放歸本國茲該番安多牛等挈

碧桃附搭夷商洋船於十月十九日回至省城據

洋行商人稟縣轉報到臣即令該縣隨傳碧桃

親父認明領回伏查將人口出境下海例禁森嚴

但安多牛等自呂宋越海重譯遠來前因一時愚

昧不知例禁價買碧桃歸國嗣經訪查即改過悔

罪立限送還 臣仰體

聖主柔遠鴻慈暫將該番安多牛等保候可否念其外夷無知誤犯旋即悔悟尅日送回

恩准將安多牛方濟各二犯從寬省釋其經手之林興觀等飭司究擬發落 臣未敢擅便伏乞

皇上睿鑒批示遵行謹

奏

既知悔罪送還自應寬宥將安多牛方濟各二犯即省

釋遣回本國以示懷柔遠人之義

雍正十年二月十八日廣東巡撫臣鄂彌達謹

奏為恭繳

硃批原摺事竊臣於雍正九年十月內具摺

奏覆文武和衷緣由奉

硃批覽奏知道了但以言行相符為務欽此臣惟凜遵

聖諭不敢徒託空言務期見諸實行仰副

皇上諄諄訓誨之

聖心所有歷次奉到

硃批原摺理合另封恭繳謹

奏

覽

今命爾署理總督事務更當加勉以期毋負朕委任之意

雍正十年三月十九日廣東總督臣郝玉麟廣東

巡撫臣鄂彌達謹

奏為奏

聞事竊照粵東地方去歲冬底雨雪優渥二麥豐茂現
今俱已收穫自入春以來雨水十分霑足早晚二
稻陸續栽蒔將竣禾苗秀茂仰荷

皇上敬

天勤民休祥協應將來豐稔可期所屬府州縣內間有米
價稍昂者亦飭將存倉穀石照存七糶三之例減
價平糶秋收買補還倉現今米價俱平自五錢以

至一兩不等瓜茄菜蔬俱皆肥大臣等恐塵

聖懷理合繕摺奏

聞伏祈

皇上睿鑒謹

奏

覽粵東雨水情形朕懷深慰

同日又

奏為遵

旨覆奏事竊照廣東肇慶府陽春縣蓮塘寨地方賊衆
乘夜打劫居民嚴謙光嚴涵光等家一案於雍正
九年十月十六日奉有

上諭一道臣等遵查雍正八年十月二十八日夜陽春
縣民人嚴謙光嚴涵光等家被劫有賊七十餘徒
一節查當日新興石窩汛把總王進賢原報開有
賊七十餘徒旋據該縣詳報被劫情形及當時追
獲李有德訊據供開夥黨一十三人並無七十餘

徒之多臣等彼時亦曾風聞恐有減報盜數情弊
一面密加確訪一面飭司親提事主盜犯解省細
審嗣據該縣續獲事主已逐舊僕為首糾劫之林
日章等到案僉供同黨實止一十三人合之先獲
李有德初供無異業經臣郝玉麟叙入疎防案內
題叅在案迨將事主盜犯提至省城經按察使黃文
煒親訊亦與縣報初供脗合嗣又據署電白縣稟
稱因觀風院亦有風聞令其訪查伊即屢次密遣

親信之人至事主前後左右細加探問盜數實止一十餘徒似無減報盜數情弊又盜夥帶有藤牌鎗刀等械逞兇拒捕一節查此案現據臬司招解經臣等提犯會審據各犯堅供實止攜帶扁挑木棍並無藤牌鎗刀等械其當時被獲之李有德因脚撞傷疼痛落後是以被鄉民等拏獲各犯早已爭先兔脫何敢逞兇拒捕等語查李有德係鄉民拏獲交黃泥灣汛把總姚昇因當日係百總盤天

揚之父盤子盛同鄉人追趕遂捏為弁兵追獲但該犯既先被鄉人擒拏則無拒捕之處甚明又事主單開贓物等件約計銀一千餘兩該縣指為謊報反將事主掌嘴一節臣等面訊該署縣王博厚據稱實因訊供時謙光自恃府書語言頂撞掌嘴數下是實並無勒令事主改供情弊隨查失單所開贓物確估僅止值銀數十金并據接任知縣王元樞再三查訊事主所供贓物俱與單開數目符

合則該署縣似無諱飾抑勒情事今奉到

上諭臣等逐一會鞠密加細察與前情無異再查此案

盜夥一十三人已經拏獲十名現在另疏具

題其未獲李色國李唐長張耀富三名飛飭選差幹

捕分頭上緊緝拏務獲究擬勿使漏網以仰副

皇上靖盜安民之至意所有查明原委理合據實

奏覆伏乞

睿鑒謹

奏

覽奏知道了然朕於此案究不能無疑

廣東巡撫臣鄂彌達謹

奏為請改州縣轄屬以便吏治民生事竊照粵東惠州府轄屬十二州縣潮州府轄屬十一州縣廣袤千數百里而兩郡城皆處海濱沿海鎮協營縣布置周密惟北路山中千餘里獨為空虛程鄉長樂等縣乃汀贛惠潮來往要衝匪類潛滋之處並無

大員彈壓且距府窻遠吏治民生多有未便查惠屬之興寧長樂二縣乃在藍關以東水分東流似乎天生形勝已不屬惠而自府城至二縣六七百里挽舟逆流踰山度嶺又買舟順流而下計程十有餘日考試詞訟命盜訊駁往返維難官民皆苦勞費此二縣之宜籌畫者也潮屬之程鄉平遠鎮平三縣俱在蓬萊灘以北自府城至三縣計程有六七日民庶山深刁蠻健訟潮郡煩劇非常即不

須三縣僅有海陽潮陽等八邑已極難治郡守日夜辦理尚恐精力不周此三縣之宜籌畫者也臣思程鄉平鎮興長五縣聚居一處東控閩汀西界藍關南阻萬山北遏江贛天然自一提封不必遠屬惠潮而惠潮東北千餘里寥濶空虚似宜另設直隸州統轄之考程鄉一縣在宋為梅州地居興長平鎮適中四縣路程皆一二日可至以臣愚見應將程鄉改縣為州恭請

皇上欽定佳名設直隸知州一員統轄興寧長樂平遠
鎮平四縣改教諭為學正改典史為吏目不必有
增官置吏之勞一轉移間於五邑吏治民生大有
裨益而惠潮兩府亦不致有鞭長莫及之虞矣臣
又思程鄉地處衝要向以千總駐防殊覺太疎今
若改為直隸州則應將駐劄平遠縣之平鎮營遊
擊移駐新州以潮陽營之守備移防平遠縣並將
興寧守備原係惠協分防一併就近改屬州營統

轄以一事權庶無呼應不靈之患可以綏靖地方
遠近享牧寧之福矣再查程鄉文風極盛而歲科
取進生員僅同中學十五名殊未相稱今若改為
州學應請

皇恩加廣進泮名額以宏鼓勵臣為嶺東遼澗治理事
宜起見未敢擅便合先具摺請

旨倘蒙

皇上俞允臣即會同督臣繕疏具

欽定四庫全書

殊批諭旨

卷二百十五之二

十三

題伏乞

睿鑒謹

奏

潮屬程鄉以縣改州之處與署撫楊永斌再加詳議如
意見相同會疏題請

雍正十年四月十六日署理廣東總督臣鄂彌達

謹

奏為恭請

聖訓事竊臣以菲才荷蒙

聖恩超擢畀以封疆重寄莅任年餘涓埃未報茲復奉
恩綸命臣署理總督印務聞

命之下益深感激悚惶伏思總督統轄全省文武兼理
兩粵鹺政臣自揣庸愚何能膺此重任惟有實心
實力保固地方整飭營伍一切辦理諸事務必矢
慎矢公不敢一毫欺誑亦不敢瞻徇情面稍涉沽
名但慮智識短淺未必有當顧此海疆要地不能

面聆

聖訓恐滋隕越仰懇

皇上恩賜訓示俾臣得有遵守裨益封疆從此地方官

弁兵民亦共沐

聖德於靡涯矣謹

奏

覽奏已悉督撫職守封疆俱屬一體但能勉勵公誠何慮不克勝任耶

同日又

奏為奏

聞事竊照總督駐劄肇慶原因向來兼轄兩廣而肇郡
介在東西兩粵之間設立總督衙門居中控制兩
省之事俱得就近料理誠為因地制宜今粵西一
省已歸雲貴總督總轄而粵東一省形勢廣州實
為適中之地茲臣欽奉

恩命署理總督印務若沿舊例駐劄肇慶則地處西偏

恐於一省事務不克周知辦理隨查廣州府原有
總督衙門自應駐劄在省則東西南北俱得就近
節制甚屬便捷今臣接受督印之後現在起程赴
肇考驗官兵稽查圍基海口等處事竣仍回省城
駐劄居中控制彈壓官民且於巡撫觀風司道俱
得朝夕咨商同心協辦於地方實有裨益臣仍不
時往肇整理營伍考驗官兵謹繕摺奏

聞伏乞

皇上睿鑒謹

奏

好肇廣均屬粵地隨時變通酌量而行可也

雍正十年五月二十九日署理廣東總督臣鄂彌

達署理廣東巡撫臣楊永斌謹

奏為叅奏事竊惟三運

萬年吉木乃係

欽工急需之物臣等故謹選料委肇慶府同知陳起騏

等星夜催趲小心運送所到關津自應預清河道
一到開關護送無使稍有耽延詎有安徽省委管
蕪湖關務太平府知府李暉者據差員陳起騏等
稟稱上年十二月十三日督押三運楠木抵安慶
地方恐關津阻滯請有巡撫通關文照至十九日
抵蕪湖關乃管關知府李暉閱文批不即放行
縱容家人書役勒索掛號下艙小票掣批放關等
項規禮又載長大木植之民船十一隻勒加飯食

火耗加秤等項以致阻滯稽延至正月初六日始
得開行等因到臣等伏查

萬年吉木攸關緊要

欽工該府李暉何得一任家人書役勒索規禮恣意措
延且有彼省撫臣程元章文照乃敢抗違不遵藐
視

欽工似此玩縱之員難以緘默理應具本

題叅緣事屬隔省謹繕摺叅

奏伏乞

皇上睿鑒敕部嚴加議處以為玩法誤公者戒為此謹

奏

該部嚴察議奏

署理廣東總督臣鄂彌達謹

奏為請

旨事竊照廣州一府為全省總會要區外接大洋逼處
海濱各路營汛亟宜留心料理查東莞虎頭門一

路有水師副將新安遊擊等營汎過東來洋面之
衝新會廣海寨一路有叅將遊擊等營汎過西來
洋面之衝獨中間一帶防範實疎雖順德有左翼
鎮總兵駐劄香山有副將駐劄而潭州黃梁都等
數處海口宏開無藩籬之隔實為兩腋要害揚帆
直入可以徑抵省城似不可不為籌畫者臣不揣
迂愚於巡撫任內遣理徭同知龐嶼帶同精細員
弁登戶詳觀各岸口島澳廣狹險易可以容隱賊

舟及賊素出沒之處往返數月始得其詳臣復親往海濱查勘的實所有廣州海洋口岸情形并添設汛防撥兵築城建臺等事宜以及省城城外礮臺建置之地未得其宜應行更移添築之處臣謹備細繪圖粘標恭呈

御覽是否可行合先繕摺請

旨倘蒙

皇上俞允臣即會疏具

題伏惟

睿鑒謹

奏

所奏甚屬周詳允當具疏題請可也至於抽撥兵弁如
可以通融足用即照此辦理倘或不敷分派另議添設
數百兵丁需費糧餉俱為細務毋因省帑而致強勉從
事

同日又

奏為奏

聞事竊匪犯陳美倫曾合等糾黨謀逆一案經臣等將先獲與曾合同黨各犯研審確供備錄呈

奏在案續據差員署韶州府通判趙弘文提到先經委員左興施士超會同平南縣拏獲之羅京相等十名又經前督臣郝玉麟差千總劉國樑拏獲之植普潤等四名又據臣差去把總李秉鈞理猛同知書辦符名章拏獲之植普答等十一名西寧縣

拏解之吳世友等二名差役郭子正祝漢章拏獲
之劉竒勝等二名准廣西撫臣陸續咨解之楊法
輪等十五名又准湖南撫臣咨解之唐奕清等二
名又據臣差委把總李秉鈞東安縣武生朱權煥
躡線拏獲散劄與錢珍等之要犯梁廸官即梁二
恭等二名臣俱帶入內署傳同司道弔並先獲之
陳美倫曾合等逐一研訊各供確鑿臣查曾合先
於省城觀音山新會外海山等處謀為不軌今復

各處煽惑欲於梧州起兵陳美倫傳唐奕清邪教
鼓惑人心已二十餘年今復欲入朋化里徭山屯
聚又欲令陳漢等屯聚於上下麥徭山接應二犯
謀逆已久罪大惡極梁二恭散劄糾衆鄧志廣與
陳美倫共謀不軌錢珍植瓊玖既受梁二恭偽劄
復為曾合糾黨羅京相陳漢歐石福植直寶劉二
儂等聽信陳美倫曾合妖言轉相煽誘俱屬罪不
容誅倘其勢已成則為禍不小仰賴我

皇上天威洪福得以早為敗露經兩省設計誘拏奮力
跟緝渠魁俱已成擒黨羽漸次全獲臣等現在將
各犯分別情罪依律議擬

題請正法所有律應緣坐之家口咨行拏禁未獲之
王瓊等遴委員弁分路跟緝務獲究擬審明無干
之韋元珠等先行釋放以免拖累已故之余之貴
等分別咨行各該地方官確查果否身死覆到另
奪在事出力人員另行開明履歷勞績請

旨獎勵厚賞再查梁二恭一犯所供湖廣朱道人投與胡百興轉給之偽劄言詞悖逆情甚可惡臣愚以為必有巨慝大姦為之發縱指示乃胡百興已伏冥誅而朱道人尚未弋獲研訊兩月有餘始則再三婉誘繼則疊加嚴刑該犯體無完膚所供矢口不易除現在再加窮究并密遣員弁前往湖廣地方分頭躡緝朱道人下落一面密札湖廣督撫諸臣轉飭地方官嚴拏務獲盡去根株不留遺孽外

臣謹會同署撫臣楊永斌觀風整俗使臣焦祈年
合詞先行繕摺奏

聞并将各犯口供備錄另封

進呈伏乞

皇上睿鑒謹

奏

覽奏各犯供情已悉具題到日有旨

同日又

奏為遵

旨覆奏事竊照匪犯陳美倫曾合等糾眾謀逆一案先

經臣等摺

奏奉

硃批拏獲各犯甚屬可嘉所差委員升當厚加賞擢以示獎勵此案須徹底嚴究務盡根株不可少涉畏悞率忽致有疎漏欽此欽遵除臣等嚴究陳美倫等供

詞另摺奏

聞及理徭同知龐嶼等另摺

奏請

睿鑒外臣查在事出力之因公呈誤革職年滿千總施士超初由理徭同知龐嶼差委兼同督標千總劉國樑帶領兵役拏獲匪黨楊士元等繼又計擒首惡陳美倫等各犯勞績最著臣考驗該弁人材壯健弓馬可觀原係江西袁州協標年滿千總緣宜春縣民劉開若窩賭畏罪投水自盡案內擬以威

逼革職因與龐嶼有舊赴粵留伊幫緝可否准其
開復留於臣標酌量

題補撫標外委把總黃雲龍拏獲首惡曾合等各犯
甚為出力可否以臣標千總補用撫標把總李秉
鈞拏獲惡犯梁二恭等并在錢珍家起獲偽劄五
張亦著勤勞可否補授千總以示獎勵撫標把總
李育外委千總鄔連均與黃雲龍等同行出力人
材俱健弓馬可觀可否將李育補授千總鄔連拔

補經制把總東安縣學武生何九星與施士超協
力擒賊膽識頗優弓馬亦好可否以經制把總補
用又武生朱權煥同把總李秉鈞躡線緝賊亦屬
出力馬戰兵郭子正祝漢章張光祚梁朋光等跟
隨黃雲龍等協緝獲犯俱甚屬効力應與朱權煥
並拔補外委把總再有効力處拔補經制把總督
標千總劉國樑初同施士超拏獲匪黨楊士元等
四名繼復拏獲黨犯植普潤等三名亦有勤勞應

照拏獲隣境夥盜七名例從優議叙差役周用等
二十一名俱曾出力臣現在酌量每名賞銀二十
兩以上在事出力人員臣謹遵

諭旨逐一聲明勞績分別等次獎賞擢薦會同署撫臣
楊永斌觀風整俗使臣焦祈年合詞繕摺奏

開伏乞

皇上睿鑒謹

奏

辦理俱是照所議行應具題者具疏題奏應達部者咨
部存案

同日又

奏為遵

旨覆奏事竊照拏獲匪犯陳美倫曾合案内之在事出力員弁兵役經臣等分別獎賞擢薦另摺奏

聞外查雍正九年九月間臣於巡撫任內因匪首李梅未獲商同前督臣郝玉麟遴委理瑤同知龐嶼捕

緝該員查至西寧縣地方訪知有猛山散創一事
計擒匪黨楊士元等密訊供出陳美倫等謀逆實
情并各犯姓名住址稟報到臣即飛飭密拏隨
據該員遵委革職千總施士超東安縣武生何九
星等帶領幹役往廣西藤縣五屯所改裝設計拏
解陳美倫鄧志廣等到臣即傳同司道在署密
訊供出夥黨羅京相等又因該員熟悉東西兩省
情形凡經臣遴選員役指授機宜分頭購緝俱令

與該員商酌而行是以本案渠魁夥黨俱已陸續
全獲實屬始終效力之員臣查龐嶼由廣西舉人
雍正五年

命往廣東試用前經委署鎮平歸善番禺三縣俱能料
理地方著有成效自補授理搖軍民同知受

恩感激益思報效實心辦事才守兼優洵屬幹練之員
欽奉

硃批諭旨格外薦擢因無相當之缺未敢冒昧議

請陞補所有同知龐嶼勞績不敢壅於上

聞臣謹會同署撫臣楊永斌觀風整俗使臣焦祈年合

詞繕摺奏

聞伏乞

皇上睿鑒謹

奏

龐嶼既於此案係始終效力之員遇有相宜府道缺出
援旨具疏題補

雍正十年閏五月十三日署理廣東總督臣鄂彌

達謹

奏為奏

聞事竊惟粵東田禾一年兩熟仰荷

聖主敬

天勤民感召和氣屢登大有今春雨水十分霑足二麥俱

已豐収禾稻插種及時臣恐圍基低窪處所雨水

稍多因往肇慶看兵巡視海口營汛之便遂親履

圍基查勘因西水旋長旋消各處圍基並無衝決
坍洩之處而圍內禾稻俱極暢茂詢諸各處民人
僉云今春雨水充足入夏以來雨暘時若圍內圍
外高下田地俱十分豐茂早插時者已經收割其
稍遲者亦皆豐茂將來自獲大有現在地方寧謐
民風熙皞除早稻收成數俟布政司彙報到日
另行

奏報外合將臣經過各處豐稔情形繕摺奏

聞伏乞

皇上睿鑒謹

奏

粵東雨暘時若情形以手加額覽之

同日又

奏為奏

聞事竊查匪犯余猊糾黨謀逆業經臣等恭摺奏

聞并将一千人犯提押來省訊據供出閩省夥犯黃五

舍等咨提赴粵訊供助匪情實亦經具

題在案嗣復將余猊再四窮究又據供出夥犯陳奇

和林日恭係揭陽縣人隨又密飭查拏去後續據

該府縣稟稱有武舉黃裕典於五月十三日祭祀

關帝會衆飲酒近地居民多有疑訝等情又經密飭

訪查茲該縣將陳奇和林日恭密行拏獲並查出

余猊等於上年被拏時曾留信於羅謂玉陳奇和

欲令糾衆劫獄將羅謂玉並獲到案與陳奇和林

日恭分別研訊各據供認本年四月初十日在於羅謂玉家商謀招黨竒和遂招約林日恭王阿佑并黃裕典而王阿佑又招得吳來亭謝阿天李阿網及兵丁李廣等商議去救余猊訂於五月十三日拜把因各處地方嚴緊無計可施商量且先下船出海再作道理旋被訪覺查拏各自逃散等語拘到王阿佑等研訊供認相符惟武舉黃裕典兵丁李廣尚肆狡辯等情具報前來臣等查余猊不

法已極正在窮究黨羽而羅謂玉等復敢聚謀劫
獄似此一黨姦惡萬難輕宥除密飭文武嚴拏餘
夥并将武舉黃裕典另疏叅革一面將現在人犯
提押至省臣等親加嚴究務盡根株另摺具

奏外所有續獲余猊案犯并查出聚謀搶犯緣由臣

謹會同署撫臣楊永斌觀風整俗使臣焦祈年合
詞先為奏

聞謹

奏

覽奏續獲案犯緣由知道了事關匪徒設謀糾黨慎密
為之母忽

雍正十年六月初九日署理廣東總督臣鄂彌達

謹

奏為安插窮民開墾情形仰祈

睿鑒事竊惟粵東地方山海交錯民俗刁悍貧苦者多
所以小民惟利是圖每於封禁之礦山潛往偷挖

甚至販私盜竊毫無顧忌雖因習尚澆漓輕蹈法網亦由無田可耕無業可守遂致漸流為匪臣自抵粵以來將奉到歷次

諭旨刊刻遍示曉諭勸導一面嚴飭該地方文武官弁時加巡邏勿任礦徒聚夥偷挖旋據各屬覆稱小民聞有

上諭欣喜觀聽咸知感激

天恩不敢輕犯原封硃口無人偷挖臣隨行查各屬曠

土及實在無業窮民已據各屬報到二千餘戶正在商酌安插荷蒙

聖主垂念

欽差禮科給事中徐杞偕臣等悉心辦理隨經科臣徐

杞親歷山場通行查勘各處礦硎皆屬封固硎口

蔓草叢生並無偷挖之事惟是無業窮民若不悉

心調劑使其衣食有賴難保後來不蹈故轍查肇

慶府大官田地方新設鶴山一縣及附近恩平開

平等縣現有荒地數萬畝以之開墾耕種安插貧民最為相宜臣上年曾委糧驛道陶正中料理新縣城工兼令查勘荒地鶴山縣境現據丈出荒地三萬三千餘畝查業戶耕地百畝須佃五人此可安集佃民一千六百餘戶恩平開平荒地甚多不止一二萬畝現今丈出五千餘畝尚未及四分之一因該處地廣人稀雖有藩庫墾荒銀兩莫肯赴領承墾臣等諭令有力商民招集惠潮等處貧民

給以廬舍口糧工本每安插五家編甲入籍即給地百畝復念各佃遠來托居雖有可耕之業仍恐日後予奪憑由業戶不能相安應為從長計議凡業戶領田百畝各佃俱帶領地五畝與田主一例納糧永為該佃世業田主不得過問庶佃戶稍有餘資無偏枯之嘆亦可無逋租之虞今惠潮二府貧民就居鶴山耕種入籍者已有三百餘戶現在陸續依棲日益增聚兼聞先到之人安頓得所無

不踴躍趨赴其各屬未報貧民亦必陸續報出容
臣等遍查高雷廉等各府州縣可墾荒地一并丈
出次第設法安插使窮民皆有恒產足以資生不
數年間野無曠土地無遺利全粵深山窮谷無復
有失業遊手之民風俗淳美夜戶不閉地方官民
均感

浩蕩洪恩於無既矣謹將安插緣由會同署撫臣楊永

斌科臣徐杞合詞繕摺奏

聞伏乞

皇上睿鑒謹

奏

貧民如此安插甚好料理殊屬妥協

同日又

奏為遵

旨覆奏事竊查潮州鎮臣李萬倉

奏請將黃岡協柘林汛左營守備改為柘林水師專

防海澳配造船隻分泊柘林管轄港口之雞母澳
西虎仔嶼二水汛哨巡一摺奉

硃批言之督臣酌議具奏欽此
前經督臣郝玉麟檄委

惠潮道胡恂確勘議詳前來臣細加覆核查柘林

一汛在黃岡之東為明初沿海五水寨之一向以

閩廣上下往來必經視為海道第一關鎖門戶則

當時南澳棄為盜窠無官兵守巡之故也我

朝掃靖海氛設立總兵大員鎮守南澳左右福廣兩

營雄踞海中柘林已在肘腋之內是以汎防定制以黃岡協營守備防守柘林於雞母澳礮臺駐防官兵八十四員名西虎仔嶼礮臺駐防官兵二十四員名皆為陸汎俱屬黃岡協管轄礮臺之下一帶汪洋俱屬南澳鎮水師管轄設船三隻配兵一百名專防雞母澳大小金門等水汎則以諸汎距南澳鎮城不過二十五里之海面宜歸畫一以專責成不另立水師法至善也茲若將柘林守備改

為水師添造戰船則陸汛已屬空虛柘林所轄之馬頭山等處諸礮臺勢必又另撥兵防守此更改之不便於陸汛者也且二十五里之海面兩岸俱設水師勢必與南澳右營分內外洋界內則咫尺之地無所庸分外則洪濤巨浸難以分清一遇失事反得滋其推諉此更改之不便於水汛者也查雞母澳礮臺固為要緊之區然陸汛有官兵駐防水汛有戰船巡緝至周至密可以不必更張西虎

仔嶼礮臺依山傍岸四面俱係礁石淺沙戰船原
不能至止因洋面界限無憑分別遙望此嶼為界
東屬左營西屬右營並非應防汛之所更可無煩
籌畫應將該署鎮所請之處均無庸議理合繕摺
奏覆伏乞

皇上睿鑒謹

奏

所奏是將此議當令李萬倉知之以增長其識見

雍正十年七月初二日署理廣東總督臣鄂彌達

謹

奏為恭報粵東早稻收成數仰祈

睿鑒事竊照粵省今歲春夏雨水霑足早稻業已登場

茲據署布政司黃文煒將各屬早稻收成數彙

報前來臣查各府州所屬收成自十分九分以及

八分七分不等各屬米價自五錢起至八錢一二

分不等目下新米上市價值自必益減其各處農

民呈報瑞穀一莖數穗者甚多家給人足共慶盈
寧此皆我

皇上敬

天勤民精誠感格是以海隅蒼生咸歌樂利所有各屬早

稻收成細數臣謹另摺分晰恭呈

睿鑒為此謹

奏

覽粵東收穫并米價情形朕實深為額慶

同日又

奏為酌裁鹽政陋例以節浮費事竊照鹽政衙門向為利藪及歸督臣管理節經查明應歸公者

奏明歸公應禁革者陸續禁革現在一無陋例但查運使衙門商人上納鹽餉庫官庫吏每百兩尚有規禮三錢拆引每封規禮一兩經歷規禮二兩每年約數千餘兩又有單房收標修秤埠差等項飯食名色每年約計亦數千餘兩雖積弊相沿由來

已久而為數殊覺太過今臣俱一一斟酌約算各
官役出入之數量加裁革或存留一半或裁七存
三務俾官役可以辦公而亦不容因以為利再查
運使衙門向有公匣一項衆商內每年公派六人
於運使署側設立公櫃每商折引一封上價之後
運使填發水程不給該商領去轉發管理公匣之
人每封繳銀十九兩方將水程給發衆商惟恐領
遲以致違限不得不與名曰公費每年約銀六七

千兩以備運使衙門不時之需及督臣生日年節
禮物之用臣查運使衙門向有收餉每百兩加平
三兩三錢上價每百兩加平八錢除支解銅觔水
脚都察院飯食起解各餉平頭路費及臣衙門書
役工食紙劄外每年約餘五千餘金以作養廉已
足敷用不應復累各商至臣衙門禮物向來俱不
收受此項銀兩臣曾檄取公匣收支底簿閱看不
過供此管匣六人之酒食花銷而已衆商血本所

關而此六人假公費名色用如固有甚屬不合臣
已嚴飭革除至於各場大使管理竈曬向例發價
皆有扣頭收鹽皆有加秤一年四節曬丁柵長皆
有額規又有家人司事巡丁各項小禮邊海窮民
所得官價尚且不敷工本若再層層剝削民何以
堪欲不走私勢必罷曬臣已將扣剋竈最甚之
博茂場委員陳紹箕咨革究審仍通行申飭現在
各場皆知儆懼改悔臣亦容其自新倘有不遵臣

亦斷不姑恕臣蒙

天恩總理鹽政惟有悉心整頓總期弊革風清以仰副
皇上恤商恤竈至意所有酌裁陋例事宜理合據實奏
聞伏乞

睿鑒謹

奏

嘉是覽焉務期言與行符實力勉為之操守一節為大
臣立身之根本果能於此堅持不移屬員何有不服公

務何有不辦加意砥礪自勉莫視為易事

同日又

奏為奏

聞事竊照貴州黎平一帶新闢古州地方素不產鹽又

無額引民苦淡食

臣

前任貴州布政時知其地向

俱買食淮鹽價值昂貴民甚不便

臣

思淮鹽運至

彼地路途遙遠脚費繁多自應價貴若粵東運至

古州一水可通路費尚少不難減價銷售且粵省

產鹽甚廣現在壅滯若黎平一帶鹽可多銷不但
便該地民食亦可裕東省課餉一轉移間於黔粵
兩省俱有裨益前經廣西撫臣咨會議先撥西省
存留善後鹽五百包前往試銷以後即令黔員領
廣東引鹽運賣但臣查古州河道開通商賈輻輳
銷售必多既需行銷東省鹽包不若東省專委幹
員前往相度會同料理庶乎每年銷引封數沿途
運脚多寡應責何員考課應定賣價幾何更得核

查明確臣現在咨商貴州撫臣撥出子鹽一封專
差原任潮贛分司俞文耀運往該地試銷每觔暫
定價銀二分一釐聽該地民苗買食除俟試銷有
效酌定引目擬立成規另行

題增引餉外理合先行奏

聞伏乞

皇上睿鑒謹

奏

試為之如果通行有益具疏題請可也

同日又

奏為請

旨事竊照兩廣鹽務頭緒繁多苟非經理得人不能肅
清無弊查省河與潮州之廣濟橋各場埠係運使
運同經理輾轉遷延拖欠累十數萬若不極力整
頓款項究不能清誤兵餉而虧帑項臣實不敢因
循苟且上負

皇上便民裕課之盛心查得運使馮元方才具雖尚明
晰但與商人親密往來遇事每多瞻徇課餉恐有
掩飾完欠難以稽查再潮州分司程哲人雖樸實
而會計無才潮汀各官埠積欠亦多俱未清白雖
據稱皆有鹽包可抵竊恐不無那移必須調員徹
底清查然後實欠實完方有著落可以漸次督追
臣查馮元方不便再留此任現在廣南韶連道李
可淳病故臣已會同撫臣另本

題報查此缺事簡尚易勝任請以馮元方調補觀其
後效至運使一缺查有韶州府知府陳鴻熙操守
廉潔辦事精明剔弊釐姦不避嫌怨緣其人心直
口快不能面從故有狂妄之名其實現任各府罕
出其右且從前曾經辦理潮州運同事務於鹽務
甚為熟悉以之陞授鹽運使必能弊杜風清倘蒙
俞允其韶州知府一缺容臣等另選

題補至運同經管潮惠汀贛四府鹽務料理整飭亦

須廉幹之員查有潮州府同知張士璉居官明決
操守潔清堪以調補運同至現任運同程哲久任
海疆尚無別項劣蹟請以借補潮州府同知各該
員調任之後實欠實完無能掩飾自易盤查矣臣
為清查完欠防侵杜那起見用敢仰懇

天恩俯准調補伏乞

皇上睿鑒

特降俞旨施行謹

奏

照所請有旨諭部矣

同日又

奏為請

旨事竊照廣州府香山縣屬有淇澳麻子二村淇澳孤
懸大海人跡罕至麻子三面倚山一面临海汪洋
浩瀚風濤異常又離縣窩遠稽查莫及兩村居民
約數百家恃險為巢半作海洋盜賊臣於本年五

緝拏轉易驚逸於是張示曉諭宣布

皇仁許其投首槩從寬典旋據陳理開六船之盜夥陳
亞五等六十五人自行投首并有別案黃玉純等
一十九人聞風同出并繳出小船十有一隻礮械
六十四件皆各伏地謝罪情願自新於六月二十
日押解來省隨檄行按察司嚴審究擬去後茲據
府縣審供由司詳報前來臣查海洋行劫比照陸
路响馬罪在不原但查雍正七年七月十九日礦

盜謝恩榮等行劫海豐縣梅隴墟徐秉閑等家自行投首一案經前督臣郝玉麟審明

奏請奉

旨將拒捕傷人之黃天明等斬決餘犯從寬分發各省當差在案今麻子淇澳二村匪犯一經龐嶼等宣揚

皇上保民如赤之盛心伊等即自行投首除各船為首之陳理開歐陽德祐羅象興羅象茂羅惠倫蔡得

明均屬法無可貸既經拏獲律應斬梟逃軍鍾捷
聰另案歸結外其六船盜夥自行投首之陳亞五
等六十五人原訪無名聞風投首之黃玉純等一
十八人皆屬情有可原查各犯生長海濱駕船度
活熟識水性海中俱能潛行數十里查現在各標
新設哨船水手兵丁未盡諳練若每船再添一二
熟練之人更為有益臣等不揣冒昧仰懇

皇上天恩可否俯念各犯既經投首准予自新或發川

陝入伍當差抑或

恩准仍留廣東配各巡海船隻每船酌撥二人既可教習水師亦易收管約束

洪恩出自

聖裁 臣等未敢擅便再各盜理應分案具

題因該犯衆多又經自首若循次議結未免監候日

久不無疲斃堪憐可否

敕部議結追贓給主以儆兇頑以寬脅從伏乞

皇上睿鑒批示遵行臣謹會同署撫臣楊永斌觀風整
俗使臣焦祈年合詞請

旨謹

奏

此自行投首各犯作何結案之處該部速議具奏

雍正十年九月初三日署理廣東總督臣鄂彌達
謹

奏為人才難得據實奏

聞仰祈

睿鑒事竊臣一介庸材荷蒙

皇上天恩畀以封疆重任蚤負弗勝時虞隕越夙夜思
維惟期得人以資治理不特現任屬吏加意甄陶
即降黜罪廢之員臣亦留心訪查臣於抵粵之初
即聞有原任潮州府普寧縣知縣藍鼎元操守廉
潔實心任事被叅去任百姓謳思臣猶未敢遽信
兩載以來細加體訪乃知藍鼎元不特人才可用

抑且品行端方查藍鼎元係奉

旨補授廣東普寧縣知縣行文督撫試看以要緊州縣
缺酌量題補之員緣雍正六年署潮陽事任內有
原任惠潮道樓儼運貯潮陽西穀被押運巡檢范
仕化等勾同船戶沿途盜賣并買批穀攬和共缺
少穀三千二百石樓儼令鼎元代賠鼎元無力賠
補致被樓儼揭叅革職所有擬追贓項皆同官及
士民代為清完臣在粵兩載鼎元從未至臣衙門

投一票刺本年三月內因藍鼎元叅案已清檄調
來省傳入署中細加觀察與臣訪聞無異伏念我
皇上愛惜人才寸長必錄臣仰體

聖心何敢知而不言不揣冒昧謹據實具

奏如蒙

皇上天恩特賜召見臣即給咨藍鼎元赴京引
見自必感激

洪恩益加勉勵矣為此謹

奏

藍鼎元應賠之項如果全完案件既經清楚給咨令其赴部引見可也

同日又

奏為奏明事竊照雍正九年六月間臣在巡撫任內時有安南番民鄧文武等男女共五十六名口在伊本國平順府開船往嘉定府販買稻穀洋中遭風飄入廣東銅鼓角海面經巡海官兵搭救護送

至省臣隨行飭查驗有該國印照實係遭風破船
並無別故臣仰體

皇上柔遠洪仁卽諭地方官酌給房舍衣食如意撫恤
嗣因船商郭廣興往安南貿易之便臣給發印文
資以路費令搭郭廣興船交明該國王安插茲於
八月十八日據船商郭廣興回粵稟稱難番鄧文
武等均各平安歸國今齋有安南國王回文并帶
送臣伽南香沈香生絹棕竹胡椒燕窩魚翅海參

等物臣接閱文內無非感謝之詞但臣職任封疆
撫恤難番皆仰體我

皇上中外一家之至意非敢市惠於該國臣民也所有
土儀等物未便收受除暫寄布政司庫俟覓有安
南貿易便舟寄還外理合據實奏

聞伏乞

睿鑒謹

奏

辭讓不受甚是仍須婉言覆之庶為得體

同日又

奏為請

旨事竊照粵東一省山海險阻易藏匪類查有廣肇二府連界之百峰山係新會新寧香山開平四縣所轄壘巘千層路徑叢雜人莫能識且距海甚近素為洋盜逋逃淵藪舊有無賴匪徒招邀黨羽霸踞山場發標抽取往來商漁船隻及入山樵炭花紅

銀米客民受害無可如何歷任督臣欲行擒剿賊
在高山瞭望官兵進口即先遁藏剿捕難施益無
顧忌山中荒田數千頃莫敢前赴壑闢即山外附
近之錦被萌等處膏腴廣衍俱置拋荒數十餘年
無人過問皆由伏莽未清是以良民畏避我

皇上德威遠播近年以來已經漸次散去山中匪類不
過數十餘人仍索取樵炭船隻花紅擾民若不悉
心經理不特客民受害且使千頃膏腴淪為棄壤

臣委員密查得其姓氏隨密諭肇慶府知府劉庶
開平縣知縣張漢等細心辦理設法躡緝并多發
告示諄切開導令其悔罪自新隨據該縣張漢先
後招到賊首陳亞滑彭上彩李雅拱三名到臣臣
隨與署撫臣楊永斌觀風整俗使臣焦祈年面加
開導該犯稽首伏罪皆各感激

皇恩情願出力擒招夥黨贖罪臣隨賞給花紅等物仍
交該縣帶往招緝旌據陳亞滑等三人先後招到

羅阿九等四十七名赴開平縣及廣海營各報解到臣隨檄委肇慶府會同開平縣訊取各犯確供去後嗣據報稱各犯俱供認因貧無食入山抽取炭廠花紅漁船錢米不諱查此案匪黨原係五十人除鄺天遠等五名先於本年三月內因犯別案拏禁新寧縣監應於彼案審結現在投首人內惟彭擢干等六名供認本年閏五月內搶過伍德叶柴船一次應俟彼案審明仍照自首例議結未

獲張傑有黃傳連到日另結外其餘四十四人並
無強劫案犯俱係窮民失業以故羣聚私抽是必
安插有方然後地方永靖臣細加驗看查陳亞滑
等二十四名俱皆年力精壯諳曉武藝若以分發
各營給糧操防則其身心既有約束衣食又有仰
賴倘遇搜緝山谷彼皆可以效力至陳祖帶等二
十名皆係農民素知耕種臣經檄委糧驛道陶正
中勘丈恩平之錦被萌等處荒地令招民墾作田

園擬每名給田二十畝另給牛種口糧銀十兩編
入保甲令各保長管束則伊等皆樂業安生不致
復蹈前轍矣至百峰山曠地臣當另委能員勘查
清丈招墾又可安插惠潮貧民數千家臣為安插
莠民開墾荒地起見此現在自行投首人等應否
如臣所請就地安插抑應發往別省當差臣未敢
擅便伏乞

皇上睿鑒

特降諭旨施行臣謹會同署撫臣楊永斌觀風整俗使

臣焦祈年合詞具

奏

朕未親睹若輩情形何可遙定斯事不便特降諭旨施行應否就於本地安插在汝審度區處可保他日不擾地方乃係極當之舉若稍涉疑似仍照例辦理為是汝斟酌允協然後具題奏請本內不必援引此旨

署理廣東總督臣鄂彌達署理廣東巡撫臣楊永

斌謹

奏為遵

旨據實回奏仰祈

聖裁事雍正十年七月二十七日

臣等奉到內閣交出

廣東右翼鎮總兵臣李維揚摺奏內稱外洋商艘

從前皆在虎門口外灣泊迨康熙五十年間移入

番禺縣之黃埔距省城僅三四十里其早晚操演

銅鐵大礮省會之地大非所宜請飭令仍在虎門

海口灣泊等語奉

旨李維揚奏摺著寄與署總督鄂彌達署巡撫楊永斌
閱看其言可採與否令伊等據實回奏欽此臣等查
得虎門所屬巨海汪洋風濤甚險其口外口內皆
不可長久灣泊若現在夷船停泊之黃埔實係逼
近省城一任夷商揚帆直入早晚試礮毫無顧忌
未免駭人聽聞該鎮臣所奏之言實有可採伏查
香山縣之澳門河下上至沙窩頭下至孃媽閣地

濶浪平可以長久灣船現今澳夷各洋船皆在此處停泊實屬安穩無虞況查從前洋艘原灣此地緣康熙二十五年粵海關監督臣宜爾格圖據澳夷目唛囉哆等結稱澳門原為設與西洋人居住從無別類外國洋船入內混泊等因具

題經部覆准故至今各洋船皆移泊黃埔地方但臣等悉心詳查澳門原係內地西洋人不過賃居豈容澳夷視為已物如云澳門為西洋人之地不便

容別國洋艘停泊豈黃埔內地顧可任其久停耶
臣等仰懇

聖恩請自雍正癸丑年為始凡各外國夷船仍照舊例
在澳門海口拉青角地方與西洋澳夷船隻一同
灣泊所有往來貨物即用該澳小船搬運仍飭沿
途營汛往回一體撥駕柴船護送礙位軍器不得
私運來省如此則內地防範周密夷船亦無漂泊
之虞矣 臣等謹遵

旨據實回

奏伏乞

皇上睿鑒施行謹

奏

九卿會議具奏

雍正十年九月十九日署理廣東總督臣鄂彌達

謹

奏為請

旨事竊照廣肇二府連界之百峰山匪黨私抽一案經
臣等先後擒招得陳亞滑等五十五名業將別案
有名之鄺天遠等十一人分別歸案陳亞滑等二
十四名議發各營食糧陳祖帶等二十名議給牛
種墾荒未獲黃傳連張傑有到日另結於本年九
月初三日具摺請

旨茲復據署廣海寨遊擊馮元稟稱有犯黃傳連率領
向年同在山場之李亞七陳亞丁汪亞六三名俱

赴營投首於九月十六日押解到省臣等覆加看

驗黃傳連李亞七年力精壯頗諳武藝堪以入伍

陳亞丁汪亞六皆知耕種堪以墾荒理合分別奏

聞或俯照臣等所議安插本省或發別省當差伏乞

皇上批示遵行臣謹會同署撫臣楊永斌觀風整俗使

臣焦祈年合詞具

奏

遵照前旨施行

同日又

奏為呈請代奏恭謝

天恩事竊查廣東每年鹽政奏銷各項使費餘剩銀三千餘兩經前任督臣郝玉麟奏請自雍正九年為始將此項餘剩銀兩補給提鎮養廉不敷提督給銀六百兩左翼右翼碣石潮州高州瓊州南澳七鎮各四百兩等因經大學士鄂爾泰等議覆具

奏奉

旨依議由部行文到粵欽遵照會在案今據各該鎮臣

李萬倉等合詞呈請代為

奏謝等由到臣理合據情代

奏再照此案又准廣東提臣張溥咨稱叨蒙

皇上隆恩畀以封疆重任俸薪之外復蒙

賞賜親丁養廉名糧八十分營中公務又有公費名糧

儘足用度分給銀六百兩請留為別項公用不必

解送等因咨覆到臣臣查此項銀兩既准提臣張

溥請留別項公用自應存留充公另撥別項之用
合併陳明伏乞

皇上睿鑒施行謹

奏

覽奏知道了張溥養廉銀兩仍當給與

同日又

奏為敬籌各標生息銀兩永遠流通勻給賞賚之法

仰冀

聖裁事竊照粵東一省督撫提鎮各標兵丁荷蒙

皇上天恩賞給帑銀一十萬兩存公生息以資吉凶賞
賚之需復以各協營兵尚未遍及時廩

聖懷雖經前督臣郝玉麟

奏請於雍正癸丑年一例開賞在案但臣將各標生
息本利細加核算尚屬不敷若不悉心料理則通
省兵丁不能均沾賞賚查原帑十萬兩現在借給
鹽商各標二分生息三年以來皆無缺少已經開

賞仍有餘剩至開當各標除清一切費用之外利息不及一分若每月抽銀給賞勢必虧本故開當各標至今兵丁尚未開賞焉有餘潤以及協標臣思生息一項欽奉

諭旨原著臣等通融辦理不必膠於一定如滇黔宜於分派營運自應分散各營若粵東分派煩難則又不如聚總生息臣通盤核算似宜將當舖一總收起俱按引分借鹽商每月每兩二分起息逐月月

底繳鹽運使兌收將所得息銀按通省各標營兵
丁多寡分派令該營於每季赴省領餉時即將該
營應得利銀順便領回以備賞恤最為妥便查現
在帑本十萬兩利銀亦約有三萬兩若借給鹽商
二分生息每年可得利銀三萬一千二百兩自本
年十月起至雍正癸丑年六月則所得利息即可
勻給通省各標即協營亦可一例開賞均沾

皇上一視同仁之實惠矣臣為均平生息接濟開賞起

見已與署撫臣楊永斌面酌並札商提臣張溥俱
與臣意見相同是否有當伏乞

皇上批示遵行謹

奏

果能令闔省標協兵丁均沾實惠永遠通行無弊自屬
善舉酌量為之

雍正十年十一月初九日廣東總督臣鄂彌達廣

東巡撫臣楊永斌謹

奏為恭報粵東秋成分數仰祈

睿鑒事竊照粵東通省晚稻收成分數據布政司甘汝來彙報前來查各府州屬秋成自十分九分以及八分七分不等各屬米價自五錢以至八錢二分不等且據各屬送到瑞穀自一莖雙穗以至七穗一本十數穗以至一百二十九穗自四五尺以及長至一丈一尺者不等實在家給人足共慶盈寧皆由我

皇上重農貴粟勤恤民依是以感召

天和年登大有臣不勝踴躍歡忭之至謹將各屬所報收

成細數另摺分晰恭呈

皇上睿鑒外理合據實奏

聞謹

奏

粵東秋成分數以手加額覽焉此皆卿等忠誠盡職有

以感召

天庥之所致自茲惟愈加寅畏居心敬慎從事可也期共勉之

雍正十年十二月初一日廣東總督臣鄂彌達廣

東巡撫臣楊永斌謹

奏為奏明事竊照潮州府饒平縣已革武舉余猷因窩藏偷牛賊犯被府詳革枷責挾恨問官糾黨陳阿幼等欲打鬧府署搶劫潮州府城東門行舖冀圖報復事發被拏復囑黨羅謂玉陳奇和等糾人

刦犯隨被訪查拏獲業經臣等會同先後奏

聞在案嗣將各犯提解來省飭發究審據布按二司會

同審解前來臣等傳同在省司道各官嚴加確審

據各犯供認糾黨拜盟歃血訂期思欲鬧署刦鋪

以圖報復及羅謂玉陳竒和等供認因余猊囑令

刦獄相救省城兵役衆多難以搶刦遂糾人拜盟

謀俟余猊審明解回之日在途搶刦下海逃躲各

情形歷歷不諱至究其有無預備器械船隻米糧

等項并有無謀為不軌別情據各堅供當日甫經商議即被查拏並無預備各項亦無圖謀不軌別情臣等覆核案情除懼禍未同拜盟之陳新老等七名及被陳衍鳳哄誘另一起拜盟並無歃血亦不知為匪情事之陳阿龍等六名另擬外其余猓黃五舍等三十四名照依謀叛未行分別首從問擬俱屬符協惟查余猓一犯始因窩竊犯法輒思糾黨鬧署刦鋪報復被獲之時復敢囑人刦獄且

其平日好為結納浪博仗義之名以致未經謀面
之人皆肯為其出力誠屬姦惡巨魁與光棍無二
臣等再四確酌應將余猊照光棍為首定擬斬決
餘犯照謀叛未行問擬庶情罪各得其當除現在
繕疏具

題外所有審擬該犯姦惡情形及從重問擬緣由理
合繕摺

奏明伏乞

聖鑒謹

奏

此案人犯緝捕審擬均無枉縱題到之日有旨

廣東總督臣鄂彌達謹

奏為恭繳

硃批原摺事竊臣前具奏保舉原任普寧縣知縣藍鼎元一摺奉有

硃批臣遵查得原任普寧縣知縣藍鼎元實非尋常之

才前因署潮陽縣事被叅其應追應賠各項俱係
同官及士民代完一一清楚業經前督臣郝玉麟
題明准部議覆奉

旨免罪此外並無不清之案除給咨藍鼎元親齋赴部
聽候帶領引

見外理合

奏覆並將歷奉

硃批原摺另封恭繳謹

奏

俟引見後有旨諭部

同日又

奏為秀民感激

聖化相率悔罪自新恭懇

皇恩准予安插事竊照廣肇二府連界之百峰山匪黨

勒抽花紅一案經臣等先後招撫陳亞滑等五十

五名於本年九月初三日繕摺具

奏奉有

硃批臣等悉心籌畫粵省土疆衍沃四民藝業儘可資
生而無賴者恒伏莽為活皆由前此地方官視若
隔膜不加約束游手無業之故也人非木石誰自
甘為匪類况令甲煌煌在有司亦無難區處惟仰
體

皇上仁育義正轉移化導盛心自可相安無事臣等摺
奏之後續又招到黃傳連等四名復於九月十九日

繕摺請

昔兩月以來山陬海角游手無賴之輩頗知悔悟從前失身攘竊感泣愧勵願為

聖世良民自行投首絡繹不絕據廣州府屬之清遠縣解到賊首文亞長撫黨禰汝鵬等共十名新寧縣廣海營解到賊首李逢春撫黨朱亞女等共十二名香山縣解到撫黨林開運等二十四名咸聞

聖恩寬大願乞改過自新俱與自首免罪之例相符臣

等細思此等匪徒皆係饑寒所驅無知犯法非刦殺大盜可比既已嚮風革面似可許其自新若照例發遣他省未免安土重遷背去祖宗廬墓且南人不耐寒冷將以轉徙凍斃為憂而深山窮谷一二藏匿逃竄者亦將畏避不出反塞其自新之路臣等不揣冒昧恭頌

皇恩准留本省安插通計百峰山先後招到匪犯五十
九名清遠新寧香山三案共犯四十六名臣等派

撥分發通省各營入伍當差每營不過一二名約束甚易其老弱朴愚情願耕種者分發在墾田處安插則有保甲業主約束亦不能復流為匪有恒產者有恒心為兵為農皆可安生樂業臣等再飭該管文武留心稽查勿為姑息斷斷不至擾害地方似可行之無疑緣係奉

旨斟酌允協事理謹會同撫臣楊永斌觀風整俗使臣焦祈年繕摺

奏覆伏乞

皇上睿鑒謹

奏

覽奏已悉斯事原命汝酌宜而行今既經籌思於地方有益無害斷在不疑照此辦理為是

雍正十年十二月二十日廣東總督臣鄂彌達廣
東巡撫臣楊永斌謹

奏為奏明事竊照匪犯陳美倫曾合等在廣西梧州

糾黨散剗潛謀不軌一案臣等於雍正九年十一月內查覺陸續拏獲審供俱經先後奏

聞在案茲據布按二司審擬招解前來臣等會同嚴審已各分別首從按律定擬惟查曾合原供尚認康熙五十年正月十五日同病故大盜李士雄在廣東省城觀音山商謀搶刦又於康熙五十二年六月十九日同已故容得臣在新會外海祭旗謀叛兩案亦經錄供奏

聞茲審擬具

題理應并叙但查曾合業於本案問擬凌遲處死而
昔年為首之李士雄容得臣等臣等逐一細加確
查俱已物故其餘曾從迄今二十餘年大半病故
無存若一一根究則株累必多且恐姦民誣指善
良借端生事臣等公同斟酌仰體

皇上如天好生之深仁不揣冒昧將曾合止就本案歸
結從前二案槩予免究庶無辜不致播害即反側

無知之徒亦可自安除現已繕疏具

題外所有曾合前供觀音山及新會外海二案未經

叙入緣由理合繕摺

奏明伏乞

皇上睿鑒謹

奏

止就本案歸結甚是所奏知道了

廣東總督臣鄂彌達謹

奏為據實奏

聞事竊臣一介庸材荷蒙

聖恩超擢簡任封疆數年以來時刻留心人材苟有深
知灼見練習吏治者臣不敢不據實奏

聞查

所論是徐杞將來可望成器
欽差通政司右叅議臣徐杞為人淳朴才具明達實心

任事在粵一載巡查各處山場甚屬詳細並未絲
毫驚擾地方布政使甘汝來居心醇謹才具明晰

甘汝來為人乃朕所稔知近日或肯改悔奮勉自新亦
實心任事此二員者皆練習吏治之才我
未可定然究係中才而非上等資質也留心試看此論
皇上聖明洞照諒已久在

朕殊不取
濬鑿之中臣相與共事一方細加觀察其才具皆屬難

得用敢據實奏

聞伏乞

皇上睿鑒謹

奏

覽

硃批諭旨卷二百十五之二